



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma : f Tir Yimyim

ig tir_yimyim



tir yimyim

TAPAK 8

**Myanmar tir Min Aung
Hlaing-i Russia semdang**

**Ravindra Jadeja-i Test asaya
nung wicket 350 agiogo**

VOL. XXIII ISSUE NO. 306 (ADOK 306) DIMAPUR SANGTENNÜ (TUESDAY) LUROI (AUGUST) 18, 2026

₹ 5.00

BJP National Secretary atema MP Phangnon shim

Kohima, August 17, 2026

(Agencies): BJP-i August 17, 2026 nü National Office Bearers tasentem shimba osang metetdaksüogo aser tasenpurtem rongnung Nagaland nung Rajya Sabha MP S. Phangnon Konyak dena lir.

BJP National President Nitin Nabin-i National Secretaries 16 shimtetba rongnung Phangnon Konyak dena lir.

Nabin-isa National Vice Presidents 13 shimogo aser parnok rongnung Vasundhara Raje Scindia aser Ram Madhav na densema lir.

Nabin-i National General Secretaries 8 shimtet aser Morchas balala nung ketdangpurtemi shimogo.

Prime Minister Narendra Modi-ia tasenpur ajak nem tenüngsang agütsüogo aser iba telok nung organisational experience, energy aser

grassroots connect külemi longiemdaksüogo ta ashi.

Phangnon Konyak-ia Prime Minister Modi aser BJP National President Nitin Nabin na dang pelaba metetdaksüogo.

Patton aser Yephthomi nati
tenüngsang agütsür

Nagaland Assembly nung BJP Legislature Party leader aser Deputy Chief Minister Yanthungo Patton-ia Phangnon Konyak nem tenüngsang agütsüba metetdaksüogo.

"Phangnon-i ajangshia aruba, bendanga agütsüba aser tenangzükba ajanga party aser nübortem tali tajungba tenzüksü imlar" ta pai ashi.

Maneni, Nagaland State BJP President Benjamin Yephthomi-ia Konyak nem tenüngsang agütsüba den la shimokba ya Nagaland aser Northeast ajunga atema konang ka lir ta ashi.

Tashiyim agi 'Vande Mataram' metendaksütsüla: Rafiqul Islam

Guwahati, August 17, 2026

(Agencies): Pei mulungteta Vande Mataram atenba atema ashishitep kecha malitsüla saka compulsory metendaksütsüla ta All India United Democratic Front (AIUDF) lennir Rafiqul Islam-i ashi.

Tamangba yimsü mesüra tamangba yimsü inyakyim tangar nem tashiyim agi mebenshidaksütsüla aser Vande Mataram atenba mesüra matenba asoshi talenba kecha malitsüla ta Rafiqul Islam-i ashi.

Shirnoki 'Vande Mataram' atentsü mulunger parnoki tenang. Onoki iba nung mashishiteper. Saka metennürtem nem tashiyim agi

metendaksütsüla" ta pai ashi.

Iba ken ya linük nem tetushi agüja aten saka tekong kar nung tsüngrem külemba dena lir ta Islam-isa ashi.

"Nisung ka indang tamangba yimsü tangar nem tashiyim agi mamangdaksütsüla. Hindu nuger parnoki tsüngremtem külemtsü talenba kecha mali, Muslim nunger nem Allah dak alaka tanga tsüngremtem külemtsü mesüra apudaksü atema tashiyim mebenshitsüla" ta paisa metetdaksü.

Sorkari iba tangatetba ya agizüksüla aser iba ken atenba ya compulsory masü saka pei nija nem yutsütsüla ta Islam-isa ashi.

Nagaland nung tzünglu kanga arutsü

Dimapur, August 17, 2026

(TYO): Nagaland State Disaster Management Authority (NSDMA)-i August 18 nungi 21 tashi Nagaland nung tsüngsang-mopung indang osang metetdaksüogo.

Anogo pezünü tsüngda Longleng nung tzünglu teimtiba (81.15 mm) arutsü, parnok sülen Mokokchung nung 59.85 mm, Peren nung 51.72 mm, Tuensang nung 50.67 mm, Mon nung 47.26 mm, Wokha nung 46.78 mm aser Tseminyu nung 43.98 mm arutsü ta NSDMA-i ashi.

August 18 nü Longleng aser Phek kübok tesem kar nung tzünglu terara arutsü aser Dimapur o Peren nung tsüngmok atena aser tsüngi aia yipru süitsü


imlar ta NSDMA-isa metetdaksüogo.

August 19 nü Longleng, Mokokchung, Mon, Peren aser Shamator nung yipru den tzünglu terara arutsü.

August 20 nü tesem teimba ka nung tsüngsang-mopung majungtsü aser talisa Longleng, Mokokchung, Mon, Tseminyu, Tuensang aser Zunheboto nung yipru, tsüngi aser tzünglu arutsü ta NSDMA-isa metetdaksüogo.

August 21 nü tesem aika nung kasa tsüngsang asütsü aser talisa Chümoukedima, Kiphire, Longleng, Mokokchung, Mon, Tseminyu, Tuensang, Wokha o Zunheboto nung yipru, tsüngi aser tzünglu arutsü ta parnokisa ashi.

BJP ketdangpur tasen nung Ex-CM 3, MP 18, Tetsür 10 dena lir



New Delhi, August 17, 2026

(Agencies): BJP-i züngsem 64 agi akümba national office bearers shimtetba nung ketdangsübaren nung mongintem aser telok maparen nung aika ajangshia arurtem temeyoktep lir.

Talisa BJP ketdangpur tasentem rongnung lanur tejak aika lir, tesem balala nungi shimoka lir aser lokti nung telemsa ajunga dena lir. Ketdangpur tasentem rongnung parnok 40% tashi tangar memenepba kintem nungi lir.

Telok tasenba nung states aser

Union Territories 23 nungi nisungtem shimokogo. Iba ama nübotem shimokba ajanga national president indang executive team nem tashi talia agütsür.

Tang nisung shimokba nung Northeast nung temulung balaka agütsüogo. Tripura, Assam aser Nagaland nungi lennir kaka shimtetogo. Maneni, Sambit Patra lenisüba kübok North-East Coordination Cell maneni aotsü.

West Bengal, Madhya Pradesh, Maharashtra aser northeast nungi lisopur kaka

Manipur nung anti-census sentong nung kaketshir 2 yiru

Imphal, August 17, 2026

(Agencies): Manipur nung Hombarnü census anema lungkak aitdang kaketshir ana yirua lir. Parnoki National Register of Citizen (NRC) metembang tashi census maparen meinyaki atatsü akhangar.

Imphal nung Dhanamanjuri Teachers' Training College and Hindi Teachers' Training College nung lungkak aiter kari census training session meinprongtsü merandang tensa mejungi aküm aser parnok azüoktsü atema lathicharge asü ta police-i ashi.

Iba tatalokba nung yirurtem

anameta aliba mozü ki ka nung anepalutsü atema anioka lir ta police-isa ashi.

Campaign for Just and Fair Delimitation (JFD)-i parnok akhangba atalokdaksütsü atema state ajunga ghonda 48 mokdangtsü ayongzükogo.

Naga o Meitei Muslim nunger lennirtem dena civil organizations aikati pusema JFD-i sorkar dang NRC ya base year 1951 nung mapa metenzük tashi census maparen thina atatsü rongshia arur ta JFD convenor Jeetendra Ningomba-i ashi.

"Ozüng alema arurtem aser aayangi arurtem mebandangi

shimokogo aser parnok rongnung tetsür ana dena lir.

Külen, Uttar Pradesh, Tamil Nadu, aser Madhya Pradesh nungi Scheduled Castes nüba asem shimogo.

Linük kübok telemsa balala nungi tetsür 10 tashi BJP national team nung shimogo aser iba ajanga parnoki senior organisational roles nung tetsürtem shilem agidaksütsü tenangzükba sayur.

India nung tamangba yimsü tongti ajak akhümtsübutsu aser dendaksütsü atema national office nung Hindu lennirtem den Sikh nunger ka, Christian züngsem 2, Muslim züngsem 1, Jain züngsem 1 aser Parsi züngsem 1 dena lir.

Maneni, taoba Chief Minister asem- Vasundhara Raje, Tirath Singh Rawat aser Biplab Kumar Deb nunger den taoba state presidents aika shimokogo.

Parnok dak alia ketdangpur tasentem rongnung Lok Sabha aser Rajya Sabha nungi MP 18 tashi lir.

Taoba Tripura chief minister aser West Tripura nungi BJP MP Biplab Kumar Deb nem national general secretary jenjang agütsüogo.

Pa sülen Nagaland nungi Rajya Sabha MP Phangnon Konyak aser Assam nungi Mriganka Deo Barman na national secretaries ama shimogo.

Mizoram assembly-i 'official state song' agizüktsü

Aizawl, August 17, 2026

(Agencies): August 25, 2026 nungi anogo ananü Mizoram Assembly monsoon session tenzüka amentsü aser idangji state indang official song 'Ro Min Rel Sak Ang Che' adopt asütsü.

August 14, 2026 nü Speaker Lalbiakzama menden ser Business Advisory Committee (BAC) senden ka amendang session schedule renemogo.

Iba session nung state official song agizüktsü atema bangzüng

ka benoktsü aser bill Mizoram Water Information and Governance Bill, 2026 dena bill kar benoktsü.

Mizoram state cabinet-i August 10, 2026 nü Mizoram indang official state song asütsü atema 'Ro Min Rel Sak Ang Che' mulunga agizükogo.

Iba ken ya 1947 nung nüngtugu Mizo writer aser composer Rokunga-i mejemba liasü. Iba ken tenüng ya "Be Thou Our Counsellor" lir.

Mizoram nung telungpur maparen inyakdang Mizo National Front (MNF)-i iba ken ya national anthem ama benshia liasü aser idang nung jagi formal state recognition meliaka Mizoram indang anthem ama züngshir.

2022 nungi iba ken ya public rejudem nung atentsü tenzüka ajanga kanga meteta aküm. Taoba MNF-i aniba sorkari state nung school ajak nung class metenzükdang iba ken atentsü tetuyuba ka agüja liasü.

Kohima nung assistive devices tem lema agütsü



DPDB Conference Hall, Kohima nung August 17, 2026 nü angati assistive devices lema agütsüba mapang tangokba noksa ka nung Advisor, School Education, Dr. Kekhrielhoulie Yhome, ketdangsürtem aser teyari agirtem angur.

Dimapur, Luroi/August 17 (TYO): District Administration aser District Social Welfare Office, Kohima ajanga Artificial Limbs Manufacturing Corporation of India (ALIMCO) den lungjemer matamabensar (Divyangjan) aser teintet rogotem nung assistive devices lema agütsüba sentong ka Assistance to Persons with Disabilities for Purchase/Fitting of Aids and Appliances (ADIP) Scheme aser Rashtriya Vayoshri Yojana (RVY) kübok DPDB Conference Hall, Kohima nung August 17, 2026 nü ayongzüka liasü.

Iba sentong nung scheme ana kübok nisung 671 nem teyari agüja liasü. Item rongnung ADIP kübok nisung 27 yari aser RVY kübok nisung 644 yaria liasü. Kohima nung sen 62.24 lakh jenjang assistive devices ya lema agütsü (ADIP kübok sen 2.35 lakh aser RVY kübok sen 59.89 lakh jenjang).

Lema agütsüba osettsüset nungya wheelchairs 390, walking sticks 500, crutches 14, rollators ana, walkers 120, LS belts 541, spinal supports 13, knee braces 646, silicon foam cushions 265, hearing aids 100,

cervical collars 76, Sugamya cane ka, TLM kits ti, tetrapods/ tripods ana, ADL kit ka, leprosy agi shiranger ka nem cellphone ka aser commodes keta aliba chairs 457 dena alitsü.

Iba sentong nung Advisor, School Education, Dr. Kekhrielhoulie Yhome-i nisung kar sapang-i jaketa assistive devices ya agüja liasü aser yimya shidak amshia Chiephobozou, Jakhama, aser District Social Welfare Office, Kohima nung item oset ya lema agütsü.

Advisor, Dr. Kekhrielhoulie Yhome-i iba sentong nung jembidang, matamabensar aser teintet rogotem lokti nung tali amsyhitsü, sorkar indang senotsü shidak amshitsü aser department timba lungjemer grassroots nung nüburtem nem teyari schemes tem shidak agütsütsü ayongzüka liasü.

Matamabensar aika, talisa tanurtem senzusempongtsü asakba mesüra tanga tensa tia ajanga pei kidang kisung amoker. Anungji nüburtemi item ama nisungtem jangjateta yaritsüla aser lokti nung parnoka tongtipang shilem ka lir ta angatetdaksütsüla, ta Dr Yhome-i ashi.

Pai ketdangsür aser Heads of Departments tem dang mapang shidak nung sorkari nüngdakba ama inyaksü, nüngdakba mapang tim ketdangsür den osang agiteptsü ashi aser guidelines sülen manidaktetba ajanga State nung aliba senotsü akoksatsü, ta ashi.

Pai beneficiaries tem jangjateta sentong shidak yanglutsü atema tang tagidak Census operations ajanga data yanglutsü tongtipang lir ta ashi.

Kohima ya osangtsüsang anguba aser sorkar institution tsütsü tesem tajung ka nung lir asünung, yimtsüng nung aliba nüburtem dangi sorkar indang sentongtem tonga bener oa agütsütsü asoshi model yangluba nung lenir asütsüla, ta pai ashi.

Pai yimdak yimtsüngtem nung banks temi senotsü teyari agütsüba indanga jembia aser State Bank of India (SBI) jaoka parnok indang banking services aser rural outreach initiatives amala rasaa shidaktsütsü, ta ashi.

Iba assistive devices lema magütsüdag Kohima camp asoshi beneficiaries asadangba maparen July 1-6, 2026 anogotem inyaka liasü.

Kohima DPDB senden nung jana ketdangsüba indang jembia

Dimapur, Luroi/August 17 (TYO): Kohima District Planning and Development Board (DPDB) senden August 17, 2026 nü DPDB Hall, Kohima nung amandang Advisor, School Education, Dr. Kekhrielhoulie Yhome-i Kohima nung tzü supply, jana ketdangsüba aser tanga urban tebilemtsü bentettsü atema department balala tsungta teka amteper inyaksü ayongzüka liasü.


Dr. Yhome-i Public Health Engineering Department (PHED) dang water-treatment maparen inyaksü sentong aliba atema report agütsütsü ashi. Pai Urban Affairs and Municipal Affairs departments dang jana

ketdangsüba tsütsü Supreme Court-i totuyuba agüja aliba ama renema alitsü ayongzüka liasü.

Lerie aser Kohima nung Landfill site densema jana ketdangsüba sentong tenzükgogo aser mapang shidak nung teka amteper mapa kuma inyaksü nüngdaker, ta pai ashi.

Externally Aided Projects (EAPs) indang athishia jembidang Dr Yhome-i department tem dang pei Heads of Departments den teka amteptsü aser sectoral outlays tejangja, talisa Kohima nung 'solid and liquid waste management' indang kanga junga renemer taruba DPDB senden nung lemsateptsü shia liasü.

SCTE nung Graduation Day mungogo



Kohima, Luroi/August 17 (TYO): State College of Teacher Education (SCTE), Kohima nung B.Ed Class of 2026 atema 3 buba Graduation Day sentong August 12, 2026 nü agia liasü.

Iba sentong nung ajak agi student-teachers 44 nem degrees agüja liasü.

Graduation Guest ama iba sentong nung Prof. Gyanendra Nath Tiwari, Head of the Department of Teacher Education, Nagaland University, Kohima Campus, Meriema aden aser pai graduate asüba student-teachers nem B.Ed degrees agütsü aser o jembia liasü.

Sentong nung Anisha Himb, Assistant Professor menden liasü, Dr. Khriezonuo Belho, Assistant Professor ajanga pela agizükba o jembia aser iba sülen Dr. Asale Vitso, Assistant Professor ajanga pela lemsatepba o jembia liasü.

Iba sentong nung B.Ed 3rd Semester student-teachers temi temeja ken ka aten aser Rizi Sangtam-i Graduates' Speech jembia liasü.

Khrieno, Headmistress, Bayavu Higher Secondary School, Kohima ajanga special awards agütsü, aser taküm student-teachers pezü nem testimonials certificates agütsü aser itemji Rizi Sangtam, Amit Sonar, Razukhweto Tacu aser Imnanaro Aier alitsü.

Kasa sentong nung Swedezhonuo Kirha-i Nagaland University B.Ed Examination 2026 nung jenjang 18 tongtetba asoshia tetushi agüja liasü.

Iba sülen Joseph Keneisetuo Belho, senior teacher, PM Shri GMS, L. Khel, Kohima Village ajanga College Magazine sayatsü aser Dr. Thronlem Jorlim Konyak, Assistant Professor ajanga melepzüng o jembia sentong tembang.

Nagaland Angh-i Tuophema yimtsüng semdang



Dimapur, Luroi/August 17 (TYO): Nagaland Angh Nand Kishore Yadav-i August 17, 2026 nü Tuophema yimtsüng semdanga yangji sobaliba, yimsü aser nüburtemi tourism asoshi inyakba repranga liasü.

Angh ya Tuophema

yimtsüng nung pelashishia agizük aser Naga Kitchen nung tetsür temi sü atakba yimya sayua liasü.

Iba mapang pai Kharu, Tuophema Amphitheatre, Ancestral Kense's Hut, Tuophezhu Hall aser Regional

Craft and Resource Centre densema yimtsüng nung tesem balala semdanga jaja.

Iba tour nung yimdaklir temi sobaliba wazüka ayuba, tourism ajungketba, local crafts aser rongsen lenmang bushiba tsütsü meranga inyakba sayua liasü.

I-Day nung KPC-i Kripa Foundation semdang

Kohima, Luroi/August 17 (TYO): Independence Day mapang reju balala semdanga yimya mesamadaktsüi Kohima Press Club (KPC) ajanga August 15, 2026 nü Kripa Foundation semdanga yangji alirtem den sensaksema liasü.

Iba mapang K. P. Ezung, Assistant Director, Kripa Foundation ajanga iba Foundation indang otsü tongmelang agi lemsatep aser rehabilitation centre nung timtem ajangshibatema lemsatep. Iba facility ya yangji alirtem nungi ita shia fees bendenba ajanga anepalur aser

sorkar nungi senotsü teyari kecha mali, ta pai ashi.

Nagaland nung ama masü, Arunachal Pradesh aser kidanger states kar nungbo sorkari teyari peria agütsür, ta pai ashi.

Detoxification mozü tem jenjang asakba mechi yangji alir aikati mozü maliteter aser temang anepalu mesüteter ta ashi.

Tang iba rehabilitation centre nungya nisung 22 alir. Iba anogo KPC nungi executives, senior members aser züngsemtemi semdanga liasü. Parnoki iba mapang sorochoikdak amshiba osettsüset agüja liasü.

METONGSHITSÜR

Tir Yimyim adok Luroi (August) 17, 2026 mezüng tapak nung "I-Day 2026 nung sempet balala agütsüogo" ta adoktsüba osang nung, "Limasunep Jamir, IPS Inspector General of Police nem 'President's Police Medal for Meritorious Service' agütsü," ta metongshia azüngtsü mepishir. Osang mabensa adoktsüba atema kanga sasar.



New Delhi, August 17, 2026: Indian Army tem 15buba India-Thailand Joint Military Exercise 'MAITREE-XV' (2026) nung shilem agitsü atema Thailand-i apusoa aotsü mapang Indian Air Force tayimtsü anasa tangokba noksa nung angur. Iba exercise nung 9 Gorkha Rifles nungi teimba sür sepai 85-i shilem agitsü.

SC-i SIT dang Ram tekülem ki tenla auyaba report meshir

New Delhi, Luroi/August 17 (Agencies): Hombarnü Supreme Court-i special investigation team (SIT) dang Ayodhya nung Ram tekülem ki tenla auyaba bushisüngdangba report agüjang aser iba bushisüngdang tajungtiba nung tembangang, ta metetdaksü.

Chief Justice of India, Surya Kant den Justice ana-Joymalya Bagchi aser V Mohana nungeri akümba bench-i SIT dang iba bushisüngdang tajungtiba nung tembangang aser Litigants-i benokba onüktem lira agizükang, ta metetdaksü.

Bench-i, SIT indang report

ji asadanga sülen court-i Ram tekülem ki tenla ketdangsüba dak sendakba nung tetuyuba kar agütsütsüa akok, ta metetdaksü.

July 27, 2026 nü Supreme Court-i IGP Kiran S leniba nung züngsem pezüi akümba SIT ji agizüka liasü. Bench-isa SIT dang report ji hopta ana tsüngda agüjang ta tuyua liasü.

July 20, 2026 nü bench-i Uttar Pradesh sorkar dang tekülem ki tenla auyaba bushisüngdangtsü atema SIT ka tentetsü tebilemba lira metetdakjang ta ashi.

July 13 nü bench-i Uttar Pradesh Police danga Ram

tekülem ki tenla auyaba dak sendakba nung report agüjang ta tuyua liasü.

Iba ken o ya mapang lateta yur bushisüngdangtsü atema temepishiba agütsüba dak sendakba nung Court-i Ram Janmabhoomi Teerth Kshetra Trust nem-a notice agüja liasü.

Ayodhya nung Ram tekülem ki tenla aika auyaba osang temai adokba sülen RJD MP Sudhakar Singh densema nisung aikati iba ken o ya CBI nem agütsütsüla aser tekülem ki trust-i senotsü ketdangsübaaji forensic audit agitsüla, ta mepishiba ken o aika benoka lir.

Rahul Gandhi-i CM Soren dang kaketshirtem ajurutsü mepishi

New Delhi, August 17 (Agencies): Jharkhand nung recruitment exam balala nung ochimashi anema kaketshirtemi tesüiba anogo aika longkak aita aruba mapang Hombarnü Lok Sabha nung Opposition lenir aser Congress lenir, Rahul Gandhi-i Jharkhand Chief Minister, Hemant Soren dang longkak aiter kaketshirtem tsüngdong ajurua jembiang, ta mepishio.

Ranchi nung aliba Jaipal Singh Stadium nung kaketshirtemi longkak ait tenzüka sülen anogo 24 abensaogo, aser kaketshirtem karibo lumia longkak aiter.

Rahul Gandhi-i, lanurtemji tarutsü putu lanurtem lir ta shia pai Chief Minister dang lanurtem tebilemba onüktemji angadanga sülen tim teinyaktsü inyangang, ta mepishi.

Gandhi-i shidi ajanga Soren

dang, "Ni nü dang longkak aiter kaketshir lenirtem tsüngdong ajurutsü atema mepishia shidi zülur. Ibaji ajanga sorkari tanünga tebilemtsü onüktemji-a bentetsü," ta metetdaksü.

Rahul Gandhi-i, "India linük temzüng kübok tesünap nung longkak aittsüji temeden ka lir ta Congress party-i bilemer aser iba ya asen democracy tongti tongshitem rongnung ka lir. Anungji onoki paper leaks aser shisaliok tsütsü ochimashi anema longkak aitba kaketshirtem pusemtsü. India nung shisaliok inyakim ajak RSS aser BJP nati amokbanga iba ya kaketshirtem anema hadir ka ama amshir, ta onoki bilemer," ta metetdaksü.

Jharkhand Public Service Commission (JPSC) aser Jharkhand Staff Selection Commission (JSSC)-i ketdangsüa agiba exam balala

nung ochimashi anema kaketshirtemi tesüiba anogo aika longkak aita arudar.

Jharkhand state sorkari tentetba committee kati longkak aiter kaketshirtem den ken o aiben jembia arudar aser kaketshirtemi akhangba aika agizükogo.

Rahul Gandhi-i, kaketshirtemi akhangba onük aika nung telemetba agiogo, ajisüaka kaketshirtemi maneni longkak aiter, ta metetdaksü.

Pai Soren dang, "Ajisüaka maneni longkak aiter aser kaketshirtem karbo lumia longkak aiter. India nung lanurtem ya tarutsü putu lanurtem. Iba ama mapang ka nung onoki parnok pusemer. Yimlibilema nai parnok tebilemtsü onüktem angadanga, iba sülen tim teinyaktsü inyangang," ta metetdaksü.



August 17, 2026 nü New Delhi nung Maharashtra Chief Minister Devendra Fadnavis-i Ato kilonser, Narendra Modi ajurua senden amendang tangokba noksa nung angur.

Prashant Kishor-i MLA tenangzüka agiogo

New Delhi, August 17 (Agencies): Jan Suraa Party tentetsang, Prashant Kishor-i Bihar Legislative assembly nung Bankipur MLA tenangzüka agiogo.

Tawa Bankipur Assembly by-election nung pai takok ngua liasü.

Hombarnü tenangzüka agiba sülen osangbenertem den jembidang Kishor-i, "Krishna Sinha, Karpoori Thakur, Anugrah Narayan Sinha, Nitish Kumar, Lalu Prasad Yadav, Kedar Pandey, Ram Vilas Paswan aser Sushil Kumar Modi nungeri tenzüka aruba House ka nung tenzüksüji ni asoshi akhümket ka lir," ta metetdaksü.


Paisa, "Iba ya ni asoshi

khuret tuluka lir. Loktiliba aser state jenjang tajungba akümtsü atema MLA noklang aikati bendanga tenzüka aruogo aser ni parnok tsüingsü nung jajatsü," ta ashi.

Bihar kübok Bankipur ya 1995 küm nungi BJP tashi itta aliba menden ka lir. Tawa election nungbo Prahant Kishor-i vote 19,324 tali agi BJP candidate madak takok angu.

BJP national Tir, Nitin Nabin-i iba menden azüngtetsüba ajanga iba menden atema by election agitsüsa aküm.

Kishor-i Jan Suraa Party tenangzüka sülen 2025 küm mezüng Bihar Assembly elections nung toktep saka menden ka nunga takok menguteti liasü.



San Francisco, August 17, 2026: Gujarat Chief Minister, Bhupendra Patel-i US semdangba mapang Hombarnü San Francisco nung pai sentong ka nung Gujarati nungertem den jembidang tangokba noksa nung angur.

Dimagi Naxal Party indang Instagram 'followers' lakh 2.4 jungogo

New Delhi, August 17 (Agencies): Independence Day anogomong sentong nung jembidang Ato kilonser Narendra Modi-i "dimagi Naxals" ta oren ka jembiba sülen ibaji aija social media nung asayamenüa "Dimagi Naxal Party" ta ser party ka tenzükogo.

Dimagi Naxal Party indang Instagram account lapokba sülen tang followers lakh 2.4 jungogo. Iba denji külemi parnok indang X handle "Dimagi Naxal Janta Party" nung followers 7,000 dak tali jungogo.

Parnok indang omenji "Think, Research and Resist" lir.

Hombarnü parnoki X ajanga, "Instagram nung @DNJP_India anema Cyber Attack tenzükogo. Parnoki onok ola nembangtsütsü asü masüar repranga atadi," ta metetdaksü.

Parnok indang Instagram biography nung party tentetsangji "A Dimagi Indian" ta lir aser yaritepa tentetsangji "56 Inch ka" (Modi) ta shia lir.

"Onok ya Bhagat Singh sülen anidakertem lir. Parnoki onok indang accounts shibangtsütsü merangra mesüra onok dang 'linük anemertem' ta jara, ya metetdang- parnoki Bhagat Singh mezüngmeshir asütsü," ta party-i metetdaksü.

August 15 nü Ato kilonser Modi-i, ketdangsertemi Maoists

telungpurtem samatsüogo saka parnok tangatetba pusemertemi maneni lanurtem anisatsü meranger, anungji item 'Shisashir Naxals' ji jangjaba sülen sendoktsüla, ta jembia liasü.

"Maoists telungpurtem ajanga lanur lakh aika tarutsü tia raksatsüogo. Maoists rara aser tangatetba ajanga tetsütem ket nungi tanur aika rakzükogo. Küm aika iba Naxal rara ajanga linük tesem aika azüoka liasü aser prangpong agi yimsüsüa liasü," ta Modi-i ashi.

Ato kilonseri iba oren jembiba sülen Cockroach Janta Party (CJP) otongdar Saurav Das-i X ajanga, "Dimagi Naxal mesüra tanga kecha agia kecha mesütetsü, Ato kilonser. Komaser nai tazüng-tashir lanurtem dang 'Naxalis' ajar? Parnoki ner sorkar matsüngdang tasüngdangbatem benokba agi asü?" ta metetdakja liasü.

Ano Modi pusema Union Minister Kiren Rijju-ibo X ajanga, "PM @narendramodi-i opposition lenirtem dang Dimagi Naxals majar. Item ya dang Dimagi Naxals lir: 1. Maoists pusemer aser India temzüng anemertem 2. Separatists pusemertem & Arlla 370 pusemertem. 4. India nungi Northeast ya balaka kümdaktsünertem," ta metetdaksü.



TIR YIMYIM YIMOBILEM (EDITORIAL)

DIMAPUR TUESDAY, AUGUST (LUROI) 18, 2026

Govt mapai maiang tajungba !

Government nung joko mapa ajak agimadoker post tazüng maliba agi masü saka mapa aika tazüng aliyonga mapa inyakba tenzükba anogo nungi pei mulungjangi magizüktetba ochimashi mapa inyaksüsa akümba agi, pei taküm, temang aser tanela memenennüra Nagaland government mapaiibo akok tashi maiang tajungba asütsü. Aji oda, arishi tatsüka nung ano taküm tajung dang küm 30 tashi tangar kilir süa tiyazü jembia amungtsübaji jangratemtsü kabo masü. Ano, government mapai aibaji nübortem yaritsü aser tenzüktsü asoshi ai saka nübortem tenüng dang agirbo tagitsübo ajak pei agitsü dang service tepiyong bendena monger tantsür tambur akümtsübajia tepelatsü kabo masü. Atangji, government mapai irr nübortem anepalutsübaji Tsüngrem tenzükba mapa nung inyaktertem den kasa dang lir. Ajisüaka, asen lima nung ajak atema tia maka kaji, Nagaland government inyakyim ochishia shitak inyaka aotsüba 'System' mali kümogo, anungji asen meyong government files-bo ajak tiyazü agi sünga lir. Aji oda, government office nung akaba File Cover-temji tiyazü aleper ayuba amai dang angur. Talisa, tanü government mapai tasensa aier lanurtem aika jungjunga zünger nübortem tenzüktsü asoshi tangatetba aser temulungtetba tulu nung sarasadema aitsü saka mapa tenzük metenzük ka tiyazü zülutsü aser jembitsüsa akümer. Aji oda, aginüyonga maginüyonga mapa meinyaki alemba angati sen pei meyong shilem ka lemozüka bener arua agütsür. Lanur tajung, tangatet ka asoshi aji tatidang ulura ! Ano, ken inyaker tera tuluba mendeni tura, idangji mapa meinyak ser sen agizüktsüba file aser Cheque nung sign sütsütsüsa adoker. Atangji, mapai ili nungi yamaji tejen system agi mesüshia-mesüshia nübortem ochishia tenzüktsü temulungtetba nung sarasadema mapai aiba lanurto-ang ochimashiba akümer. Aji oda, government nung tuluba nungi tilaba tashi agi kodaser mapa meinyaki sen angutsü ta bilemba dak alaka, Nagaland government nung inyaktertem rongnungbo pei lima aser nübortem meima mapashitak inyakdaksütsü aser senotsüa shitak amshitsü bilema pei nübortem tenzükterbo malitsü südi ta bilemer. Ajisüaka, meimlaika Nagaland government mapa nung inyaktertem rongnung teindang nisung ka danga ali nungbo, Nagaland ajungtsü asoshi ano teimla lir ta bilemdi. Atangji, tang Nagaland government mapa nung inyaktertem yabo asangsang lima nunga masü aser pongmang lima nunga masü saka tiyazü lima nung alir asütsü. Ajisüaka, Tsüngremi asenok iba ama tiyazü lima nung alitsü asoshi meyoaka asütsü südi. Aji oda, government mapa nung tejenpurtemji toktsür, tang tasen aiertemji tiyazü yimti nung küm 30 alitsü asoshi apusoa aoer amai meima repranger. Ashiko, tasenpurtem jagi tangatetba tajung aser temulungtetba tulu nung tiyazü lima nung tiyazü mapatem ajakji ochi agi makdoker, Naga lima tajung tasen ka yanglutsü bilema aier südi, ajisüaka mapa jagi ii meyika, tiyazü jagiang parnokji amaker aser kokadoker. Aji oda, tanü Nagaland government mapai aiertem yabo tesamadaki aier amai repranger, kechiyong parnokji tong-metongka "Tiyazü System" agi alentsü. Ibaji kodang bilemdangdir, atangji Nagaland government mapai aibaji tiyazü mapa inyaksü aiba den kasa lir, anungji tulur akümyonga aser takar akümyonga item ajakji tatem nungbo Tiyazü asütsü. Iba ama Tiyazü lima ka nung kodaser asenok tashitemetet aser Tsüngremi Pai yangluba lima aser nübortem anepalutsü agütsüba shisatsü tiyazü kümdakja amajok nung amshitsü ? Atangji, tiyazü yimli aser tiyazü system yabosa makdoktsüla. Aji atema asenok tsüraburtemi aser lanurtemi khien jungjunga bilemdangdi aser Ochi lima ka asoshi asenok nisung shiai timtem tilakabosa agitsü aser takoksa tilakabosa aremstsü mulungtetdi.

OLEMSABANG

TEMESHI LAI NUNG ANÜDOKLENTIP (SOUTH) ANÜOLENTIP (NORTH) MEYOKTEPA AMSHIBADEM

~ T. Meren Paul, Kohima

English nüngja Ao nung tai meyipzuka amshiba rongnung North aser South ojang ana yaka asütsü südi. North ya Anüolen tip lirh saka aikadi Anüdoklen tip ta bilemer aser yamaji amshir. South ya Anüdoklen tip, saka aikadi Anüolen tip ta ajar. Asen Ao oshi nung Anüdoklen (East) aser Anüolen (West) ji tejangja amshia aruriba dak alaka septsülen aser tentsülen ta dang metet saka English nung North & South ta ajabaji asen Ao oshi nung tenüng maka aser denshia maru. Dr. Clarki 1911 nung Ao Naga Dictionary züludang par mapang tongti nisungdem denoshi angazükdang ojang "Tip" ta asensa amshi südi aser tesülen Temeshi Laimeyepdang North aser South aoshi O tapet ji Anüdoklen tip aser Anüolen tip ta amshitsü merang, saka technical experiment agir proof tejangja magidangi "tip" ta bendenloka amshiba jagi tezülusang tangatetba amshidang palutepdaksübaji angur. Anütsüng akum yaloka sayuba ajanga South ya Anüdoklen tip ta jangjar. Aibelen rongnung talisa asenok Temeshi Lainung English agi North ta alibaji Anüdoklentip ta kar nung meyipzuka lir saka ano kar nungbo Anüolentip ta meyipzuka angur. English nung South ta alibajia kar nung Anüolentip ta aser kar nung Anüdoklentip tapalupalua meyipzuka angur. Lai meyipzükter jagikoba dang Anüdoklentip aser koba dang Anüolentip ta ajatsüar junga mangateti palutepa meyipzükba angur. Holy Bible King James Version nung South ta 127 ben zülua angur aser North ta 125 ben zülua angur. Tzürabur T. Penzü-i tamalenTir Yimyimosang kakat nung North ji Anüolentipaser South ji Anüdoklentip ta rateta züluba ni bilemteter. Pai züluba sülen nia ocet karh nung lephsia rateta zülüogo saka memelenshi anosa Jubilee Edition nungjia kesa tai tusa amshiba angur. Central Institute of Indian Language, Mysore ajanga adokba kakat Ao English HindiDictionary by K.S. Gurubasave Gowda (1985), page-7 nung South ji anüdoktip ta rateta zülüasayua angtsü. Saka Arok Osep nung anüdoklentip ji North ta rateta zülua angur. Anepdang anüadokba ya reprangdangraanüya East nung adoker külenSouth len jagi asetzüka luyonga woer West nung mangkazüka aluraser anü akum tanüla Northlen tongloktsütsüibajagi Southji anüdoklentip ta ajar, tetezü anü indangindanga masü asetzüka lur tip lenijajar. Anjongtenari sülen anü anüoleni meyepdang anü North len asetketa atur aser anüakum tanülaSouthlen tongloktsütsü. Nai ibaji jangjanüra anepdang anü adokdang 8-9 baji nung ajok ka ali nung songdaka yuang aser ajok indang akum tanüla line-ji alinungji asüa yuang ajiser ghonda ka mesüra ana lir reprangdangra anü akum tanülaji North len asetketa tur angutsü. Mesürakilong nung kijiba (window) lapoker langpang ka nung bottle ka ataloka yur akum tanüla tonglokbaji asüa yuang aser mapang tatsüka oda minute 30 shi süia woer reprangdang nung tepila ji ajitettsü. Nekongtsütsü 1-2 baji nung reprangdangang aser anü tanüla akum lineji asüa yuang aser 3-4 baji nung reprangdangra anü akum tanüla tongloktsütsübaji South leni asetzükalur angutsü. Iba experiment jagi anü adoklentip aser anülulentip ji jangjatsür.

Temeshi Lai nung Southji Anüolen tip ta zülua alibajianüdoklentip ta melenshia meyepzüktsüla. Karh bo shidak meyepzuka lir saka timba tai meyepzuka lir. Ajidang masü Southji kar nung anüolentip ta kar nung anüdoklentip ta, aser Northjia kar nung anüolentip ta aser kar nung anüdoklentip ta palupalua meyipzuka zülua angur.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Yisu baptiba sülen küm 2,000 ajungbamong atema senden amen



August 10, 2026 nü Jordan nung 'Baptism of Jesus Christ' National Committee senden amendang tangokba noksa nung angur.

Amman, August 17 (Agencies): Yisu Khrista baptiba sülen küm 2,000 ajungbamong 2030 küm AI-Maghtas nung amongtsü; Al-Maghtas ya Yordan ayong anüdoklen tsütsü ayongkümlen Yohan baptibai Yisu baptitsüba tesem lir.

August 10, 2026 nü Jordan Ato kilonser, Jafar Hassan leniba tang mezüing 'Preparation of the Celebration of the Second Millennium of the Baptism of Jesus Christ' National Committee senden menogo.

Yisu Khrista baptiba sülen küm 2,000 ajungbamong sentong renemtsü atema tenetba committee nung sorkar ketdangsertem, Khristan lenirtem, lokti lenirtem aser reju balala nungi züngsemtem densema lir.

Iba senden nungji Ato kilonser Hassan-i King Abdullah II-i tuyuba ama aser

Jordan nung Council of Church lenirtemi benokba ama iba benjungmong atema tekeraba nung sentong yanglu tenzüksüla, ta metetdaksü.

Paisa, küm 2000 ajungbamong ajanga Jordan putiotsü aser yimsü sayaba den külemi temeshi ainlen jajar Khristantem atema Jordan ya tongti tesem ka akümtsü, ta ashi.

Paisa, küm 2000 ajungbamong amongba ajanga Jordan nung nisung ajak tesünep nung akümtsübutepa aser meimtepa aliba sayatsü, ta metetdaksü.

Kasa senden nungjisa Baptism Site nung terenlok project balala asadang; item project rongnung temeshi ainlen jajar Khristantem aser tesemdangertem atema yimtsüing ka amenoktsü, Yisu baptiba nüngtem nung museum ka aser green

corridor ka densema lir.

Committee jagisa terenlok project balala ketdangsüa reprangtsü atema specialised sub-committees tentetstsü nüngdak, ta bangjemogo.

National Committee nung mendenbubaji Ato kilonser lir aser iba luden nung züngsemtem rongnung minister tem-a kar densema lir.

Iba committee nung Bishop Christophoros Atallah (Greek Orthodox Archbishop of Jordan), Archbishop Iyad Twal (Latin Patriarchal Vicar in Jordan), Archbishop Hossam Naoum (Anglican Archbishop) aser taoba mapang Evangelical Lutheran Church nung bishop, Munib Younan nunger densema lir.

Iba committee nungsa Baptism Site Development Foundation, Baptism Site Commission aser Jordan Tourism Board nungi züngsemtem densema lir.

Afghanistan nung Khristantem lendong nung lir: Martin Parsons

August 17, 2026: Afghanistan nung Khristantem jenti taküm samatsüsa tia ka nung lir, ta yimsü temeden tsütsü mongin, Martin Parsons-i metetdaksü.

Tamalen Parsons-i Afghanistan nung tenzükba wadanga inyakogo.

Parsons-i, 1990s mapang Taliban sorkar aliba mapang nung Khristan yimsü toktsütsü memelunger Khristantembo tepseta liasü, kentenmenü nokdang aser nüktapangtar tetsürtem tepsetba sülen ayong nung tasü mangji indoka liasü, ta metetdaksü.

Küm pongu tejaklen US sepaitem Afghanistan nungi aienshiba sülen Taliban sorkar tanaben amenoka liasü.

Parsons-i, taoba mapang den medemdangra Taliban telok tang mesashiba, ajisüaka iba linük nung Khristantemi

timtem ajurutsüa akok, ta metetdaksü.

Taliban ozüing kübok tebur tain kati Islam yimsü toktsüra tanaben Islam yimsü dangi meyiptsü atema anogo asemnü agütsütsü mesüra tepseta indoktsü; ano kasa aibelen atema tetsürtem taküm piyong tepuokdak ayutsü aser mapang shia azüksü.

Tang Afghanistan nung Khristan nütsüingji 10,000 shi dang lir, ajisüaka parnoki lendong ajurutsüa akok, ta Parsons-i metetdaksü.

"Afghanistan nung Khristantem aika putu tanabuba mesüra tasembuba Khristantem lir, ajisüaka Taliban-i parnokji Islam yimsü toktsürtem ta züngshia akok," ta pai ashi.

Tang Taliban lenirtem tsüngda telok ana lir; telok

kati 1990s mapang Khristantem anema inyakba ama inyakner, ajisüaka telok katibo Khristantem aser nütsüing ajema alirtemji agizükner, ta pai ashi.

"Afghan nunger karbo Islam yimsü toktsüba agi tepsetogo aser Khristantem kar ken o-a mangadangi tepsetogo. Tang tashi nungbo khenyongi Khristantem jenti tepsetba tatalokba mali. Ano aiben Taliban appeal court-i yimsü dak sendakba aibelen atema tasüba temerenshi ajemja taküm piyong tepuokdak ang ayutsü obendang agütsür," ta pai ashi.

Ano külen Taliban-i linük nung aliba Khristantem indang osang tejangja bendendar. Kenü anogo nungbo item osang nungji ajemdaker Khristantem mita aotsüa akok, ta pai ashi.

ANO GO ABEN TSÜNGREM DEN

Tsüngrem temeim

"Aser teimlai makdaksür, kechiaser asenok nem agütsüba Tanela Temeshi ajanga Tsüngrem temeim asen temulung nung moshia lir" Rom 5:5.

Iba tekong nung temoatsü lephsia ashir, Tsüngrem temeim moshidaksür, aser Tanela Temeshi asenok nem agütsür. Asenoki item temoatsü ana mepiladaktsütsüla. Tanela Temeshiji amangba pur shia nem teti asoshi agütsü nungji, tang Tsüngrem aser Yisu Khrista, Tanela Temeshi ajanga asenok den alir. Pai asenok kodanga medoktsütsü mesüra mesendoktsü. Paji kimong kong asenok kümzüka alir, ayongpang nungi temoatsü ayimer.

Anüngtemi Tsüngrem sentsüwangshi sangdonger. Tenemtemi Tsüngrem teka mapa sayur: Tzü, Pa ain, mopung, Pa tematiba tashi teyanglushiba shilem shiai Pai yanglubatem shisatsü sayur. Saka Pa temeim koda ? Khrista kangki ajanga dang Tsüngrem temeim tesangwa sayur.

Kangki atena oa asenoki Tsüngrem temeim mereprangtsüla. Khrista mapatem jungkai adokdaktsütsü asoshi Pai Tanela Temeshi agütsü. Aseni kangki dangi arudang Pa sentsüwangshi angazüker, aseni Tsüngrem temeim angur. Iba tekong tali asen temeim asüngdangtsü menüingdak. Tsüngrem temeim talubusa ajak mulungjang nung agütsü. Ibai inyakogo ta amangang. Ne tanela iba ayongpang nung metenang. Ne mulungjang iba temeim agi anidakjang. Iba temeim nung talem agiang.

Oba, Ne temeim kü dang aser alima dang jungkai adoktsü nung Ne tenüing asanger.

America nunger missionary ka ita 9 sülen chiok

August 17, 2026: Yaküm pa puer oa liasü. Iba sülen October ita nung Niger yimtiba, parnoki pa Tillaberi region-i anir ao. Iba region nung Islamic missionary Kevin Rideout State aser al Qaeda nisung kari puer ao, ajisüaka kiralongrartem aika kanga tawa pa chiokogo, ta Serving In Mission organization-i metetdaksü.

Taoba Hokolbarnü nung dang masü saka reshikangshi ajangshiba tajung aser Khrista nung adianu, Kevin Rideout ita teku pua ayuba sülen chiokogo," ta metetdaksü.

"Kevin temang kanga junga lir aser US ketdangsertemi pa tajungtiba nung anepaludar," ta Serving In Mission-isa metetdaksü.

US Tir Donald Trump-ia, "Khristan missionary Kevin Rideout United States-i meyipa aruogo, ta ni nüma-tanga sangdonger. Kevin, the United States of America-i na pelaa agizüker. Yariteptetba atema pelar," ta lemsatepa liasü.

Yaküm October ita nung evangelical missionary agency SIM atema missionary pilot Kevin airport-i aoba mapang nung mejangjaba nisung ase

pa puer oa liasü. Iba sülen parnoki pa Tillaberi region-i anir ao. Iba region nung Islamic State aser al Qaeda kiralongrartem aika kanga yakyaka lir.

Rideout ya Serving in Mission International (SIM) nung dang masü saka Khristantem yariba Concilium Inc. ministry nunga inyaker.

Sahel mesüra West African region nung Islamic kiralongrartemi kanga timtem agütsüba linüktem rongnung Niger linük densema lir. Iba tesem (Central Sahel) ya sub-Saharan Africa nung jihad mesüra kiralongraba tiyongtsü tesem ka kümogo, kechiyong iba tesem nung dang al-Qaeda aser Islamic State den affiliate süa aliba teloktem lir.

Niger nung Khristan nütsüing ishika dang lir. Nütsüing shilem 1 shi dang Khristantem lir.

Anüolen tsütsübo Khristan noklang aika jenshiogo. Khristantem dang Islam yimsü dangi meyipang ta tuyua amokmerener.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Züngtep

(v) o renema ayu, o agi nangzüktepa ayu (agreement)

* Telok ana meraratepi yimjung nung alitsü o züngtep.

Züngtep

(v) kaket toktepa azüng, nisung ka dak talii shilem agia kaket azüng (reading contest)

* Lanurtem rongnung Laishiba züngtepba sentong ka agia liasü.

OLONG PAITEP # 7602

1		2			3		4		5
				6		7			
8									
					9				
			10						
11									12
					13		14		
15									
16							17		

TIPIEN

- Nüji masü
- Techinütsüka
- Aketa shirangba
- Pi
- Amena
- Kinü
- Tanang masü
- Lenmang
- Nübo tedi
- Tuoshi
- Shiruru apuba temenatsü

-

(4)

-

(6)

-

(5)

-

(6)

-

(5)

-

(6)

-

(5)

-

(6)

-

(5)

-

(6)

-

(4)

LANGTSÜNGLEN

- Jila tulu
- Sarasademdang tembang
- Tarutsü indang ashirtem
- Alia
- Mojing
- Tai inyakba metet
- Medemer chijiba
- Tatokba / Amadok
- Anüngdang masü
- Jabaso masü

-

(5)

-

(4)

-

(6)

-

(5)

-

(5)

-

(6)

-

(5)

-

(5)

-

(4)

OLONG PAITEP # 7601 TELANGZÜBA**TIPIEN :**

- Tesangra, 5. Mungo, 7. Kisen,
- Salem, 12. Semki, 14. Kilem,
- Kensü, 16. Sangpang.

LANGTSÜNGLEN :

- Temesen, 2. Raksa, 3. Aon,
- Aso, 6. Nile, 9. Alizüng,
- Omen, 11. Lemta, 13. Ola,
- Kin.

NAI-A YA METETTER

8990 Luxury Car Club Foundation ajanga otsü tasen ka yangluogo aser ibaji Ramada Hotel, Lucknow nung kasa vehicle registration number '8990' aliba luxury cars 250 tashi külemi adenshiba atema lir.

August 13, 2026 nü iba sentong ayongzüka agi aser World Book of Records UK-i "largest gathering of 250 luxury cars bearing the same registration number, 8990" naroküm agütsüogo.

Meghalaya nung STING energy drink noktangba agiener

Shillong, August 17, 2026

(Agencies): Meghalaya Commissionerate of Food Safety-i state ajungalen STING Energy Drink noktanga aliba salatsüogo.

STING Energy Drink aser kaketshir ka asüba na sendaktepa maliba putetba sülen tenokdangba agienogo. Iba osang ya Commissioner of Food Safety, Meghalaya-i August 15, 2026 nü metetdaksü.

Local media nung kaketshir ka asüba aser STING ajemba sendaktepa osang prokshiba sülen August 14 nü state ajungalen tenokdangba agüja liasü.

Meghalaya sorkari STING energy drink ayokba aser alemba maparen ajak anena atatsü tetuyuba agütsü. Iba tetuyuba ya sorkari public health concerns tenüng nung agütsü aser laboratory testing ajanga product jangjatsü atema liasü.

Commissioner of Food Safety, Meghalaya Dr Joram Beda, IAS-i Food Safety and Standards Act, 2006 kübok iba tetuyuba agütsü.

STING energy drink atema nisungtemi ken o tem benokogo.



Iba caffeinated beverage nung caffeine content aliba aser mandatory labelling requirements indang onüktem shia lir ta Food Safety Administration-i ashi.

STING ya Meghalaya ajungalen angur aser school tanurtem o tainlonglongtemia kanga ajemer. Iba drink nung composition aser caffeine levels indang regulatory verification ano mangu lir ta ketdangsürtemi ashi.

Kümdanga alitsü atema state sorkari Meghalaya nung food business operators ajaki laboratory examination metembang tashi STING energy drink mayoktsü tetuyuba agütsüogo.

Iba tenokdangba kübok manufacturers, carrying & forwarding agents, stockists, distributors, wholesalers, retailers, vendors aser online delivery platforms ajak dena lir.

Assam tzümetsüng nung Rs 150 crore jungnüa interim relief agütsüogo

Guwahati, August 16, 2026

(Agencies): Assam nung tzümetsüng agi kongshia alir nem Rs 150 crore jungnüa interim relief lema agütsüogo ta sorkari ashi.

Sorkarisa flood-related damage 75% inyakogo aser surveyors 1,000 tema tanüngba

tesemtemi yoka mapa inyakdar ta sorkarisa ashi.

Tang school 793 lapoka class agitsü atema yanglushidar. Maneni, tzümetsüng agi raksatsüba lenmang aser tanga public infrastructure yangludat. Sivasagar nung low-lying

areas nungi tzü atsüdoktsü atema high-capacity pumps amshidar ta sorkarisa ashi.

Sorkarisa tzümetsüng agi kongshiba tesemtem nung health camps teimba agitsü merangdar aser tzü ajanga menatepba tashidak balala asoshi tenük yokdar.

Lumding-Badarpur Hill Section nung train services melenshir

Maligaon, August 17, 2026

(Agencies): New Harangajao station anasa railway tracks (Line-1 and Line-2) yanglushiba ajanga Lumding-Badarpur Hill Section nung Line-3 ajanga dang train senzür.

Iba atema Northeast Frontier Railway (NFR)-i train services nung temelenshi kar asüba metetdaksüogo.

Cancellation of Trains:

Train No. 15615 (Guwahati - Silchar) Express - 18.08.2026 nü apusotsü aliba athir.

Train No. 15616 (Silchar - Guwahati) Express - 19.08.2026 nü apusotsü aliba athir.

Rescheduling of Trains:

Train No. 15650 (Narangi - Agartala) Express - 18.08.2026 nü apusotsü aliba Narangi nungi 22:30 hrs nung apusotsü.

Train No. 15649 (Agartala - Narangi) Express - 18.08.2026 nü apusotsü aliba Agartala nungi 23:30 hrs nung apusotsü.

Train No. 15609 (Guwahati - Sairang) Express - 18.08.2026 nü apusotsü aliba Guwahati nungi 23:30 hrs nung apusotsü.

Train No. 15610 (Sairang - Guwahati) Express - 18.08.2026 nü apusotsü aliba Sairang nungi 21:30 hrs nung apusotsü.

Train No. 15611 (Rangiya -

Silchar) Express - 18.08.2026 nü apusotsü aliba Rangiya nungi 23:30 hrs nung apusotsü.

Train No. 15612 (Silchar - Rangiya) Express - 18.08.2026 nü apusotsü aliba 19.08.2026 nü Silchar nungi 05:00 hrs nung apusotsü.

Train No. 15628 (Coimbatore - Silchar) Express - 18.08.2026 nü apusotsü aliba 19.08.2026 nü Silchar nungi 04:10hrs nung apusotsü.

Regulation of Trains:

Train No. 15625 (Deoghar - Agartala) Express - 17.08.2026 nü tapet mapang nung apusotsü.

**GOVERNMENT OF NAGALAND
DIRECTORATE OF HEALTH & FAMILY WELFARE
NAGALAND: KOHIMA**

No. DHFW-5-23/TRG-NSG/2022/

Dated, Kohima the thAugust 2026.

DECLARATION OF RESULT FOR ANM/FHW EXAMINATION 2025-2026

In pursuance to this Department Advertisement No. DHFW-5-23/TRG/NSG/2022/4607-11, dated, Kohima the 3rd June 2026. Based on the marks obtained in the Written Examination, the following candidates have been declared as selected to undergo ANM/FHW Training Course at School of Nursing, District Hospital Tuensang for the Session 2026-27.

1. General Category Roll Nos

54	628	361	369	619	92	221	495	12	190
244	512	585	82	311	321	531	535	208	265
590	229	269	276	502					

2. BT Quota Roll Nos

114	126	322	545	127
-----	-----	-----	-----	-----

3. Waiting List Roll Nos

70	121	154	267
----	-----	-----	-----

NOTE:

- Admission/Placement order will be issue on 25th August 2026 at 11:30 AM onward from Training Section (Room No. 210), Directorate of Health & Family Welfare Kohima, Nagaland.
- The Candidates are to bring their ANM/FHW Admit Card.

Dr. MERENINLA SENLEM

Principal Director

Directorate of Health & Family Welfare
Nagaland, Kohima.

Defence nung rongsen indokba ya yimjung atema lir: Taiwan tir

Taipei, Luroi/August 17 (Agencies): Taiwan-i defences tashi itshitsü temulungtetba nung lir aser taruba küm defence nung otsü yanglua senotsü indoktsü sentong lir, ta Taiwan Tir Lai Ching-te-i Hombarnü ashi aser par sorkar indang military budget proposal ya yimjung atema indokba lir ta ashi.

Taiwan indang cabinet ajanga taruba küm indang budget ya Brehostibarnü sayatsü, aser yangji defence indang sen telemsa dena lir, sak Lai-i osangbener dang 2027 indang overall defence budget ya sen T\$1 trillion (\$31.40 billion) alemtsü ta shi.

China-i democratic yimya nung yimsü asüba Taiwan ya par meyong ama züngshir aser kibur akumtsü atema mitkar aser yimtenren tsütsü nungi kanga nungshir, koba Taipei-i

khenyongi magizüker. Saka ano Washington-ia Taiwan dang par defence tsütsü senotsü tali indoktsü ayongzüker, aser kasaji US-i Europe nunga ajungshia arur, aser Lai-i tejangraba tulu nung aji agizük.

Taruba küm budget indang senden ka nung jembidang, 2027 küm defence nung senotsü indokba ya T\$1.1225 trillion ajungtsü, koba gross domestic products shilem asem tali lir, ta Lai-i ashi.

Iba yagi Taiwan pei sasa self-defence tashi itshitsü temulungtetba sayur ta pai ashi. "Defence nung rongsen indokba ya yimjung nung rongsen indokba lir, Taiwan Strait aser region nung yimjung aser tashi ita alitsü atema asenoki naneni defence force yanglutsü," ta Lai-isa ashi.

Taiwan sorkari military

modernization ya tongtipang policy sapang ka kumdaktsü aser made-in-Taiwan submarines yangluba densema defences nung rongsen tali indoktsü aiben nangzüka arur.

China indang mitkari anogoshi amai Taiwan temeket tzüym aser anünglen operation agir aser ano Beijing ya Taiwan anüdoklen Pacific Ocean nung coastguard "law enforcement" patrols ama tasa tasen amshia arur.

Taiwan-i annual Han Kuang military drills taoba hopta tembang, kong China nungeri tzüym mokdangtsü imlaa aliba raksatsü densema tensa balala indang drills agia liasü.

Külen Lai ya Taiwan nung opposition-i amokbanga aliba parliament nunga timtem ajurur, kong taküm indang budget ya ita aika menua arur Hokulbarnü ang agizüka liasü.

Ukraine-i Belgorod amak; nisung trok tepsetogo

Moscow, Lurui/August 17 (Agencies): Ukraine-i missile amshia Russia kübok Belgorod tesem amakba sülen nisung trok tepsetogo aser arishi küm 14 tain ka densema nisung pezü yiruogo.

Ukraine-i Hombarnü Valuysky district kübok Koloskovo yimtsüng amak, ta acting Belgorod Governor Alexander Shuvaev-i state meyong MAX platform ajanga metetdaktsü. Iba yimtsüng amakba mapang ki ka rongogo aser gari ka raksa liasü, ta paisa shisem.

Koloskovo ya Ukraine indang northeastern arrtsü nungi km15 shi pilar lir.

Kasa mapang nung Russia nunger sepaitemia missile aser drone amshia Ukraine kübok tesem balala makogo, aser iba mapang nisung pezü tepsetba den nisung 19 yirutsüogo.

Russia-i southeast len Zaporizhia tesem amakba mapang nisung ana tepset aser nisung pezü yirutsüogo.

Northeastern Ukraine nung Sumy amakba sülen nisung ana tepset aser nisung ka yirutsüogo, ta emergency services temi ashi.

Kasa mapang nung Russia-i central Ukraine kübok Dnipropetrovsk tesem amakba sülen nisung pongu tepset aser Russia indang guided-bomb anati Kharkiv northeast len Izyum tesem amakba sülen nisung pezü yirutsüogo.

Maneni linük south len Kherson tesem nunga nisung pongu yirua liasü.

Odesa tesem koba Ukraine south len-sa lir, iba tesem kübok Izmail district nung Russia-i port infrastructure ka maka liasü.

Iba rongnendak amakba

mapang Togo wako songer aliba civilian rong ka nung mi adoka liasü, koba temsepogo, ta Ukraine nunger ketdangsürtemi Telegram messaging app janga metetdaktsü.

Romania den arrtsü nung aliba Izmail district nung ya Danube ayong nung Ukraine indang rongnendak tuluba amenoka lir.

Russia aser Ukraine nati missile aser drone amshia kati ka maktepba sülen anogo ka lir iba ya atalokogo. Deobarnü linük anaprongla nung nisung 19 tepseta liasü.

Front-line nung rara anener aliba den US teyongtsüi ia sensaksem bangdaker aliba mapang linük ana yagi missile aser drone tem amshia kati kanga aiben maktepa arudar, aser iba ajanga civilian tem asüba tali kümogo.

Trump envoy-i Netanyahu den Gaza sentong indang jembi

Jerusalem, Luroi/August 17 (Agencies): US Tir Donald Trump indang envoy aser par apang Jared Kushner-i Hombarnü Jerusalem nung Israel Ato Kilonser Benjamin Netanyahu den ajurutepa liasü aser anogo ka tejakdang US tir indang Gaza sentong tejakleni nunger aotsü meranga Cairo nung Hamas lenir den senen mena liasü.

October ita national election agitsü lia Israel nunger opinion polls nung Netanyahu'er coalition ya tamakoklen lir, aser parnoki tan ita US-i bhukumba agreement ya magizük, koba ajanga Hamas-i nük-nü yutsütsü aser iba melen Gaza nungi Israel sepaitem ainshitsü shia lir.

Trump-i iba agreement ya noklem lemsar mapa kuma inyaka aotsü aser disarmament tenzüka mapang Gaza nungi

Israel sepaitem ainshitsü aser Palestinian police force tasen ka den yaritepa 'International Stabilization Force' ajanga Gaza nung security agütsütsü ta shia lir.

Ajisüaka Israel nung lenir talangtiba inyaksang Netanyahu-ibo Gaza nung Hamas aser tanga telungpur telok temi nok-nü jungjunga yutsüba sülen ang par linük indang mitkartem ainshitsü ta ashir.

October 27 nü election agitsü lia Israel-i Gaza mechi atsüanem kangabo malitsü ta diplomats temi ashir.

Jerusalem nung Netanyahu den senden amending Kushner den Nickolay Mladenov dena liasü, shiba Trump indang Board of Peace envoy for Gaza lir.

Mladenov ya taoba mapang UN ketdangsür liasü aser United Arab Emirates den

tesendaktep tajung lir. UAE ya Middle East nung tongtipang linük ka lir, aser taoba ita disarmament agreement nunga parnok tetsüngtai ia tongti shilem agia liasü aser rara tembangtsü atema Trump indang chichiba 20-point plan mapa kuma inyaktsü merangba nunga yakbang sür inyaker ama ajiteter, koba Israel aser Hamas nati taoba küm mulungtepa liasü.

Ajisüaka tang tashi yangji terenlok kangabo mali, kechiaser Trump indang sentong nung shilem ka ama ceasefire mulungtepaka Israel-i maneni Gaza nung amaker. Trump indang sentong tejakleni bener aotsü nükjidong nung US-i bhukuma 15-point roadmap tasen ka taoba ita Hamas-i agizüka liasü. Ajisüaka Israel-i iba roadmap ya magizüker.

(Maneni tapak 8 nung...)

Office of the
SALULAMANG KAKETSHIR TELUNGJEM
MOKOKCHUNG
Nükjidong:- "Ochi nung Tejaklen"

TENÜNGSANG TETUSHI AGÜTSÜR

Salulamang nunger Wb. S. Akum Longkumer aser Wt. Suponglila Pongen- er jala **Kr. Wapangienla S. Longkumer**-i Srimanta Sankaradeva University of Health Sciences, Guwahati, Assam nungi University level nung Bachelor of Science, Nursing nung 8th Rank jenjang ajangzükteta takok tulu ngutet nung Salulamang Kaktेशir Telungjem Mokokchung ajanga tenüngsang tetushi agütsür.

Alakteta takok tulu ajangzüktetba asoshi tenüngsang agütsüba den külemi asen Salulamang Kaketshir Telungjem Mokokchung nung züngsem ajaki tarutsü anogotem nunga ne tazüngba aser nai inyakba wadang ajak nung Tsüngremi temoatsü aser takok manung aniangma ta sarasademtsür.

Sd/-
IMLIKABA PONGEN
Tir, SKTM

Sd/-
PANGERTULA
Tongti Zülur, SKTM

OFFICE OF THE
YAONGYIMSEN SENSO TELONGJEM DIMAPUR
TENÜNGSANG AGÜTSÜR

Wb.Alem Alia Jamir-i taküm 2026 küm Nagaland nung kentenba wadang nung kanga junga takok ngua inyaktetba reprangteta state government-i pa nem konang tulu aketba 'Governor's Award' agütsüba asoshi kanga pelar aser Yaongyimsen Senso Telongjem Dimapur-i pa nem tenüngsang tulu agütsür.

Wb.Alem Alia Jamir ya Nagaland nung Digital Audio aser ken menüngoka inyakba mapatem nung samanir lir. Pa ya kentenba watang nung konang aser sempet aika anguba nüngtugo ken mejemer, ken atener aser Sound Engineer ka lir.

Ao maneni Tsüngremi pa nem tarutsü nunga pa mapa nung takok tajung moajangma ta onoki sarasademtsür.

Sd/-
(Imtilepzük Lemtur)
President, YSTD.

Sd/-
(Mar Longkumer)
Secretary, YSTD.

SANGDONGER

Mopungchuket Medemsanger Putu Menden, Mopungchuket Watsü Telongjem aser Mopungchuket Baptist Arogo, item lokti asem telongjem ajanga yamai sangdonger.

Tanü 18th Luroi (August), 2026 anogo nungi shingaia Mopunchuket ajanga aser ozü lushi nung lenmang balala nungi temesepba chiyongtsü (yi aser iba dak sendakba) bener senzütsü aser bener arutsü memelar. Shibai iba sangdong anema inyakdir senchi tulu agi merenshitsü ta ayimoktsür.

Akumjungba
Chairman
Village Council

Rev. Jongpong
Pastor
Mopungchuket B/Arogo

Rongsenbenla
President
Watsü Telongjem

Myanmar tir Min Aung Hlaing-i Russia semdanger

Yangon, Luroi/August 17 (Agencies): Myanmar junta tekolak aliba nungi tir akümsang Min Aung Hlaing Hombarnü

Russia-i ogo. April ita tir akümbe sülen tang mezüngbuba pai Russia semdanger, ta state media sangdong ka ajanga metetdaktsü.

Tir akümbe sülen Min Aung Hlaing-i semdangba linüktem rongnung Russia ya pongububa asütsü. Pai India, China, Laos aser iba ita Thailand semdangogo.

Taoba mapang general ya anüolen aliba linüktemi tenokdangba aika agütsür lir, aser tir akümbe sülen linüktem nem agizükdaktsütsü merangba mapang ka lir. Opposition

tejangja ka maliba mapang army-i teyari agütsüba party yagi Myanmar nung election koka liasü.

Junta tekola mapa bener aliba mapang Min Aung Hlaing-i Russia pezüben semdangogo. Sorkar atsüngtokba sülen ita pongu lir pai mezüngbuba 2021 küm June ita Russia semdanga security conference ka nung shilem agia liasü.

Paisa 2022 küm Russia anaben semdang aser 2025 küm March ita pai iba linük semdangogo, aser iba mapang Russia tir Vladimir Putin den Moscow nung ajurutepa sensaksema liasü.

(Maneni tapak 8 nung...)

Nagaland nungi Sepaktakraw asayar 2 Asian Games nung asayatsü



Abelen nungi - Ms Seyiekhrieno Tapa, Ms Puleno Neikha (Coach), Ms Pungotolu Puro (Coach) aser Ms Menenu Tsukru

Dimapur, Luroi/August 17 (TYO): Nagaland nungi tetsür Sepaktakraw asayar ana aser coach ana 20buba Asian Games nung India tenüng nungi shilem agitsü atema shimogo, koba state asoshi kanga nemadangsü mapang ka lir.

Iba asayamung ya taküm September 19 nungi October 4 tashi Japan kübok Aichi-Nagoya nung asayatsü renema lir.

Asayar ana ya Nagaland nungi Sepaktakraw asayartem rongnung tajungtiba ana lir. Asayar ana ya AIPSCB/SSB nungi Menenu Tsukru aser State Girls Academy Dimapur

nungi Seyiekhrieno Tapa lir.

Maneni coach ana ya Department of Youth Resources & Sports, Govt of Nagaland nungi Sepaktakraw coach Puleno Neikha aser Nagaland police ABSI DGP Sports Team (Sepaktakraw) nungi Pungotolu Puro na asütsü.

Coach anaprongla ya Nagaland nungi takok tajung anguba tetsür Sepaktakraw asayar ana lir, aser tena nem Asian Games nung India tetsür Sepaktakraw team len anitsü atema maongka agütsüogo.

Tang asayar ana aser coach ana shimba ya Asian Games

pongububa atonga linük tenüng nungi shilem agitsü atema Nagaland nungi asayartem shimba asütsü. 2010 küm nungi tenzüka state nungi Sepaktakraw asayar aser coach tem India tenüng nung shilem agia arudar.

Nagaland Sepaktakraw Association-i, state nung asayar aser coach tem nem tenüangsang agütsüba den Nagaland aser India tenüng nungi Aichi-Nagoya, Japan nung 20buba Asian Games nung shilem agiba mapang parnoki takok tajung angutsü imlaja ataba kasa sangdong ajanga metetdaksüogo.

Cameroon-i mezüngbuba Women's Africa Cup of Nations title benogo



Luroi/August 17, 2026 (Agencies): Women's Africa Cup of Nations (WAFCON) final nung Cameroon-i goal 3-0 agi Malawi koka tang mezüngbuba iba asayamung kokogo. Deobarnü final asaya nung Marie Ngah-i goal ana idaktsüba ajanga Cameroon nem iba asayamung akoktsü asoshi teyari agüja liasü.

Taküm iba asayamung makok tsünga Cameroon asemben tashi final nung tsüker liasü. Kasa mapang nung world No. 153 aser African continent nung No. 32 nung aliba Malawi team tang mezüngbuba iba

asayamung final tongteta asayaogo.

Finalists ana den semifinalists Morocco aser Algeria nata taruba küm Brazil nung Women's World Cup atema qualify süogo. Honibarnü bronze medal atema asayaba asaya ya Algeria-i penalty metsütepba sülen koka liasü.

Final asaya nung mezüngbuba shilem ya Cameroon-i amokbanger asaya aser parnok goal 3-0 agi tejakdang liasü.

Asaya nung mezüngbuba goal ya Ngah-i minute 20buba

nung indaktsü aser Naomi Eto-i tanabuba goal idakja liasü.

Asaya mezünbuba shilem madem tsünga goal tali machitsü asoshi Malawi team kanga meranga asayba mapang Eto-i agütsüba ball ka Ngah-isa idakja parnok goal asem agi tejakdang aküm.

1998 küm nungi iba asayamung asaya arudar aser Cameroon ya iba asayamung akokba linük pezübuba kümogo. Nigeria-i iba asayamung 10 ben koka lir aser Equatorial Guinea-i anaben aser South Africa-i khien koka lir.

Ravindra Jadeja-i Test asaya nung wicket 350 agiogo

Luroi/August 17, 2026

(Agencies): Ravindra Jadeja-i pa indang Test career nung Hombarnü alizüing tasen ka tongteta pa ya Test asaya nung run 4000 aser wicket 350 agiba asayar pezübuba kümogo.

Sri Lanka den Galle nung mezüngbuba Test asaya tasemnübuba nung Jadeja-i tanabuba wicket aiba sülen Test nung wicket 350 agi iba alizüing tongteta liasü. Pai Keshara Nuwantha out süja liasü.

Iba wicket agiba sülen Jadeja ya India nunger asayartem rongnungi Test nung wicket 350 agiba asayar pongububa kümogo. Pa iba list nung Anil Kumble (619), Ravichandran Ashwin (537), Kapil Dev (434) aser Harbhajan Singh (417) nunger den denogo.

India-i mezüngbuba innings nung run 462 yangluba mapang Jadeja-i run 13 yanglu aser bowling aoba mapang pai wicket ana agi.

Iba alizüing tongtetba sülen Jadeja ya Kapil Dev, Ian Botham aser Daniel Vettori nunger den yongrü kati iogo.

Par pezü rongnung Kapil run (5,248) timtiba yanglua lir aser pai Test 131 nung wicket 434 agiogo. England nunger asayar Botham-ia Test 102 nung run 5,200 aser wicket 383 agiogo. Taoba mapang New Zealand captain Vettori-i Test asaya 113 nung run 4,531 yanglu aser wicket 362 agiogo.

Jadeja-i Test 90 nung run 4,108 aser wicket 350 agir lir, aser par pezü rongnung pa kijai Test 100 masaya tsünga iba alizüing tongtetogo.

Maneni iba alizüing tongtetba ajanga Jadeja ya Test puti otsü nung left-arm spinner tem rongnung takok tajungtiba anguba asayar ka ama pa jenjang yanglushiogo. Pa ya wicket timtiba agiba left-arm spinner tem rongnung tasembuba nung lir. Pa Sri Lanka nunger Rangana Herath (433) aser Vettori (362) na sülen tasembuba nung lir aser pezübuba aser pongububa nung England nunger Derek Underwood (297) aser Bangladesh nunger Taijul Islam (271) na lir.

BENDANGLI OSANG : Tapak 7 nungi...

Trump envoy-i Netanyahu den Gaza...

Deobarnü Cairo nung Kushner aser Mladenov den senden amenba kar nung Hamas lenir Khalil Al-Hayya dena liasü ta osang ka ajanga ashir.

Ibai Kushner-i Hamas lenir den senden amenba tejangja metetba tanabuba alitsü. United States-i Palestine nunger telungpur telok ya kiralongrar telok ta nüngja agüja lir.

Kushner-i taoba mapang U.S. envoy Steve Witkoff den külemi Hamas ketdangsürtem den October 2025 nung ajuruteba tezüngzüktep ka yangluba ajanga Gaza nung

ceasefire ka sangdong aser Hamas-i October 7, 2023 nü Israel amakdang pua yua aliba nungi tanünga nisungtem chioka liasü.

Trump-i July ita tatemlen Gaza nung Hamas aser tanga telungpurtem disarmament atema tezüngzüktep ka yangluogo ta shia liasü. Hamas-i iba sentong agizüker ta ashi saka sepaitem anizüker aoba aser amakba anenba densema Israel-i nangzükba ama mezüing inyakba nung ajemdaker iba tezüngzüktep mapa kuma inyaktsü ta ashi.

Myanmar tir Min Aung Hlaing-i ...

Myanmar nung Russia indang energy company tem nem maongla lapoktsütsü asoshi Moscow-i imla-a inyakshangshidar. 2025 küm Min Aung Hlaing aser Putin na ajuruteba mapang linük ana yagi Myanmar nung small-scale nuclear power plant ka amenoktsü asoshi tenangzüktepba ka nung sign süa liasü.

Russia aser Myanmar natasa, 2025 küm February ita Dawei Special Economic Zone nung longjemer inyaktsü atema tenangzüktepba ka nung sign süogo, kong rongnendak ka aser totzü asüngtetdak ka yanglutsüba densema lir.

Min Aung Hlaing-i tang

Russia semdangba mapang Myanmar-Russia business forum ka akatsü. Pa den Tanintharyi tesem chief minister aser Myanmar indang aerospace agency tekolakba densema Russia-i ogo. Dawei ya Tanintharyi tesem nung lir.

Kasa mapang nung linük ana tsünga tawa defence tesendaktep tajungba kümogo. Moscow-i Myanmar nunger sepai aika nem training aser university scholarship agüja arudar aser iba den prangbong injang aser hadir balala yokdar.

Russia-isa, taküm küm tetenzüklen parnoki Myanmar nunger mezüngbuba cosmonaut nem training agütsütsü atema teyari agütsütsü ta shiogo.

BILEMDANGANG

"Terenlok asoshi yimjung nüngdaker."